

Bosna i Hercegovina
Federacija BiH
Kanton Sarajevo
n/r Vlada Kantona Sarajevo
n/r Skupština Kantona Sarajevo
n/r Predsjedavajući Skupštine Kantona Sarajevo

ZASTUPNIČKA INICIJATIVA ZA PREVENCIJU MOBINGA I DRUGIH MENTALNIH POREMEĆAJA I BOLESTI

Sedma radna sjednica Skupštine Kantona Sarajevo

Odgovor predsjednika Etičkog komiteta JU Psihijatrijska Bolnica KS i JU Zavod za bolesti ovisnosti KS, Prof. Dr. Miloša Pokrajca na moje pitanje sa Pete radne sjednice SKS bi vrijedilo javno pročitati, ali pošto mi nemamo previše vremena za to na sjednicama Skupštine KS svi zainteresovani mogu ga pronaći na web stranici KS u odgovorima na moja zastupnička pitanja.

Moja je dužnost prenijeti Skupštini i Vladi KS preporuku ovog komiteta „izvršnoj i zakonodavnoj vlasti **da hitno donese odluku o formiranju razumnog budžeta za prevenciju**, kako mobinga, tako i mentalnih poremećaja i bolesti (depresija, PTSP, bolesti ovisnosti i dr.) čiji su uzroci prevashodno vezani za lošu psihosocijalnu klimu u školama i na radnim mjestima, što je rezultat dugotrajno nepovoljne opće situacije u zemlji, lošeg ekonomskog standarda, upornog zanemarivanja problema vezanih za posttraumatski stresni poremećaj stanovništva čija je prevalenca u općoj populaciji veoma visoka (na šta stručnjaci upozoravaju još od završetka rata u BiH), kao i mnogih drugih sociopatoloških pojava u našem društvu. Ne treba zanemariti činjenicu da dominantan uticaj nacionalnih političkih partija na sve sfere života i rada značajno doprinosi stanju ruiniranog mentalnog zdravlja ljudi.“

Ovo je mišljenje tima stručnjaka koje moramo ozbiljno shvatiti i uzeti u razmatranje. Smatram da je važno da ova vlada u vremenu učestalih „tretmana“ kojima su građani danonoćno izloženi putem stranačkih i drugih medija, uloži određena sredstva i u rehabilitaciju stanovništva, naročito ratnih veterana, ugroženih manjina, žrtava mobinga i sl. Stručnjaci predlažu „set mjera koji uključuje sistemsku, dugoročnu, javnu i usmjerenu edukaciju stanovništva iz komunikacijskih vještina i međusobnog ophođenja, organizovanje kampanja protiv diskriminiranja drugih i drugačijih, podjelu info letaka, vodiča i pamfleta, relaksiranje opće političke klime“.

Mislim da bi Kantonalna televizija u saradnji sa stručnjacima, kao i sama vlada u saradnji sa civilnim sektorom morala aktivnije poraditi na proizvodnji javne kampanje u KS koja će osvijestiti problem loše psihosocijalne klime u gradu i Kantonu Sarajevo.

Sarajevo, 17.04.2019. godine

Samostalni zastupnik u Skupštini Kantona Sarajevo

Damir Nikšić